

摘藻堂四庫全書薈要

集部

欽定四庫全書薈要

集部

遺山集卷二



臣董誥詳校
詳校官助教臣謝登雋

欽定四庫全書薈要

遺山集目錄

卷一

古賦
五言古詩上

卷二

五言古詩下

卷三

七言古詩上



卷四

七言古詩

下

卷五

雜言

卷六

古樂府

卷七

五言律詩

卷八

七言律詩_上

卷九

七言律詩_中

卷十

七言律詩_下

卷十一

五言絕句

六言絕句

七言絕句_一

卷十二

七言絕句 二

卷十三

七言絕句 三

卷十四

七言絕句 四

卷十五

宏詞

卷十六

碑碣_一

卷十七

碑碣_二

卷十八

碑碣_三

卷十九

碑碣_四

卷二十

碑碣五

卷二十一

碑碣六

卷二十二

碑碣七

卷二十三

碑碣八

卷二十四

碑碣九

卷二十五

碑碣十

卷二十六

碑碣十一

卷二十七

碑碣十二

卷二十八

碑碣十三

卷二十九

碑碣十四

卷三十

碑碣十五

卷三十一

碑碣十六

卷三十二

記一

卷三十三

記二

卷三十四

記三

卷三十五

記四

卷三十六

序引_上

卷三十七

序引_下

卷三十八

銘贊頌

卷三十九

書疏
雜體

卷四十

上梁文 青詞 祭文 題跋

臣等謹案遺山集四十卷金元好問撰好問字裕之秀容人中興定五年進士天興中除左司都事轉行尚書省左司員外郎金亡不仕事蹟具金史文藝傳是集賦詩十四卷文二十六卷為明御史李瀚所刊本好問才雄學瞻高古沉鬱金元之介屹然為文章大宗

所撰中州集意在以詩存史去取尚未盡精
至所自作則興象深遠風格道上無宋南渡
末江湖諸人之習亦無江西流派生拗粗獷
之失後來雖虞楊范揭名重一代皆未能凌
跨其上至古人繩尺嚴密衆體悉備而碑版
誌銘諸作尤具有法度晚年嘗以史筆自任
構野史亭採金源君臣遺言往行裒輯紀錄
至百餘萬言今壬辰雜編諸書雖已無傳而

元人纂修金史多本所著故於三史中獨稱
完善亦可知其著述之有裨實用矣乾隆四
十二年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書薈要卷一萬六千六十三

集部

遺山集卷一

金 元好問 撰

古賦

秋望賦

步裴回而徙倚放吾目乎高明極天宇之空曠閱成律
之崢嶸于時積雨收霖景氣肅清秋風蕭條萬籟俱鳴
菊鮮鮮而散花鴈杳杳而遺聲下木葉於庭臯動砧杵

於蕪城穹林早寒陰崖晝冥濃淡霏拂繞白紆青紛
薄之相依浩霜露之已盈送蒼蒼之落日山川鬱其
平瞻彼輾轅西走漢京虎踞龍蟠王伯所憑雲烟慘其
動色草木起而為兵望崧少之霞景渺浮丘之獨征汗
漫之不可與期竟老我而何成挹清風於箕頽高巢由
之遺名悟出處之有道非一理之能并繫南山之石田
維景略之所耕老螭盤盤空谷淪精非雲雷之一舉將
草木之偕零太行截天大河東傾邈神州于西北悅風

景於新亭念世故之方殷心寂寞而潛驚激商聲於寥廓慨涕泗之緣纓吁咄哉事變於已窮氣生乎所激豫州之土復於慷慨擊節之誓西域之侯起於窮悴傭書之筆諒生世之有為寧白首而坐食且夫飛鳥而戀故鄉嫠婦而憂公室豈有夷墳墓而剪桑梓視若越肥而秦瘠天人不可以偏廢日月不可以坐失然則時之所感也非無候蟲之悲至於整六翮而睨層霄亦庶幾乎鷙禽之一擊

蒲桃酒賦

劉鄧州光甫為予言吾安邑多蒲桃而人不知有釀酒
法少日嘗與故人許仲祥摘其實并米炊之釀雖成而
古人所謂甘而不飴冷而不寒者固已失之矣貞祐中
鄰里一民家避寇自山中歸見竹器所貯蒲桃在空盎
上者枝蒂已乾而汁流盎中薰然有酒氣飲之良酒也
蓋久而腐敗自然成酒耳不傳之秘一朝而發之文士
多有所述今以屬予子寧有意乎予曰世無此酒久矣

予亦嘗見還自西域者云大石人絞蒲桃漿封而埋之未幾成酒愈久者愈佳有藏至千斛者其說正與此合物無大小顯晦自有時決非偶然者夫得之數百年之後而證數萬里之遠是可賦也於是乎賦之其辭曰

西域開漢節迴得蒲桃之奇種與天馬兮俱來枝蔓千年鬱其無涯

音崖

歛清秋以春煦發至美乎胚胎意天以

美釀而飽予出遺法於湮埋索罔象之玄珠薦清明於

玉杯露初零而未結雲已薄而仍裁挹幽氣之薰然釋
煩捐於中懷覺松津之孤峭羞桂醕之塵埃我觀酒經
必麴蘖之中媒水泉資香潔之助秫稻取精良之材效
衆技之畢前敢一物之不階艱難而出美好徒醜毒之
貽哀繫工倕之物化與梓慶之心齋既以天而合天故
無桎乎靈臺吾然後知珪璋玉毀青黃木災音哀而鼓
鐘味薄而鹽梅惟殫殘天下之聖法可以復嬰兒之未
孩安得純白之士而與之同此味哉

新齋賦

予既罷內鄉出居縣東南白鹿原結茅菊水之上聚書而讀之其久也優柔厭飫若有所得以為平生未嘗學而學於是乎始乃名所居為新齋且為賦以自警其辭曰

新之為說也在金曰從革在木曰從斤丘陵為山而惡乎畫履霜堅冰而致於馴猶之於人則齊魯有一再之漸狂聖由念否之分唯夫守一而不變者不足以語化

化之為神附陳迹以自觀悼吾事之良勤失壯歲於俯
仰竟四十而無聞聖謨洋洋善誨循循出處語默之所
依性命道德之所存有三年之至穀有一日之歸仁動
可以周萬物而濟天下靜可以崇高節而抗浮雲曾出
此之不知乃角逐乎空文張北轅以適楚將疇問而知
津揜虛名以自夸適以增頑而益囂我卜我居於浙之
濱方處陰以休影思沐德而澡身蓋嘗論之生而知困
而學固等級之不躡憤則啓悱則發亦愚智之所均齋

戒沐浴惡人可以祀上帝潔己以進童子可以遊聖門
顧年歲之未暮豈終老乎凡民已焉哉孰糟粕之弗醇
孰土苴之弗真孰昧爽之弗旦孰悴稿之弗春又安知
溫故知新與夫去故之新他日不為日新又新日日新
之新乎

行齋賦

戊子冬十月長壽新居成仲經張君從予卜鄰得王氏
之敗屋焉環堵蕭然不蔽風日君為之補罅漏治蕪穢

蓋十日而後可居華門主賓故事畢舉取君子素其位而行之義名曰行齋而乞文於予予以為士之貧至於君極矣無祿以為養無田以為食無僮僕為之負販無子弟為之奔走無好事者為之謀緩急而助薄少率賢無旬日計泰然以閉戶讀書為業不以為失次而以為當然不以為怨不以為憂而又且以為樂也然則不謂之無媿其名也而可乎迺為賦云

賦分在人如物有常反鶴與鳬無益短長力有可來勝

天不祥福不盈睫一敗莫償莫難養心操存舍亡出入
無時分莫知其鄉飽飢有時而激兮怒殆豢虎之貽殃
我思古人動靜有方靜以養虛剛以作彊辱以處汙愚
以退藏屹中立而不倚邇橫潰而獨障直釣磻溪之魚
禿節單于之羊有漆身以為厲有被髮而為狂仕汙世
而執翽徇殊俗而解裳太阿存兼善之達緼袍有不求
之臧唯夫長劍大冠以揖讓人主之前者若固有故木
食澗飲雖至於勞筋骨而餓體膚者為無傷古有之居

不隱者志不廣身不抑者志不揚士固有遯世而不復
見然愈揜而愈彰南山蒼蒼北風雨霜有蘭不彫俟春
而芳偉哉造物又將發吾子之幽光耶

太阿即阿
衡見文選

五言古詩

箕山

幽林轉陰崖鳥道人迹絕許君棲隱地唯有太古雪人
間黃屋貴物外祇自潔尚厭一瓢喧重負寧所屑降衷
均義稟汨利忘智決得隴又望蜀有齊安用薛干戈幾

蠻觸宇宙日流血魯連蹈東海夷叔采薇蕨至今陽城
山衡華兩丘垤古人不可作百念肝肺熱浩歌北風前
悠悠送孤月

緱山置酒

同內翰馮丈叔獻雷兄
希顏賦詩分韻得賓字

靈宮肅清曉細栢含古春人言王子喬鶴馭北上賓白
雲山蒼蒼平田木欣欣登高覽元化浩蕩融心神西望
洛陽城大路通平津行人細如蟻擾擾爭紅塵蓬萊風
濤深鬢毛日夜新殷勤一杯酒媿爾雲間人

同希顏再登箕山

千年箕山祠蘿逕深以峭桂樹不復見禿藪餘秋篠盤
盤盡絕頂石冢平木杪長風萬里來筋骸覺輕矯側身
望岩竇解衣憩林表是時夏春交野色亂青縹川光乍
明滅地脉互縈繞岡巒蟻垤出井邑蜂衙擾紅塵洛陽
昏白雲太行曉元功信冥漠一覽疑可了悟彼東山人
胸中魯宜小

光武臺

東南地上游荆楚兵四衝游子十月來登高送長鴻當年赤帝孫提劍起蒿蓬一顧渚水斷再顧新都空雷霆萬萬古青天看飛龍歸然此遺臺落日荒烟重誰見經綸初指揮走羣雄白水日夜東石麟幾秋風空餘廣武歎無復雲臺功

潁亭留別

同李治仁卿張肅子敬王元亮子正分韻得畫字

故人重分携臨流駐歸駕乾坤展清眺萬景若相借北風三日雪太素秉元化九山鬱崢嶸了不受陵跨寒波

淡淡起白鳥悠悠下懷歸人自急物態本閒暇壺觴負
吟嘯塵土足悲咤迴首亭中人平林澹如畫

隱亭

春物已清美容懷自幽獨危亭一徘徊翛然若新沐宿
雲淡野川元氣浮草木微茫盡楚尾平遠疑杜曲生平
遠游賦吟諷心自足竭來著世網抑抑就邊幅人生要
適情無榮復何辱乾坤入望眼容我謝羈束一笑白鷗
前春波動新綠

出京

史院得告歸
嵩山侍下

從宦非所堪長告欣得請驅馬出國門白日觸隆景半
生無根著飄轉如斷梗一昨隨牒來六月阻歸省城居
苦湫隘羣動日蛙黷慚愧山中人團茅遂幽屏塵泥免
相浣夢寐見清潁矯首孤飛雲西南路何永

元魯縣琴臺

荒城草木合破屋風雨侵千年一琴臺睠焉涕盈襟遺
愛食縣社公寧不堪任此臺即甘棠忍使無餘陰旁舍

高以華大豪日捐金蒼雲玄武暮鬼物憑陰岑尚德抑
玄虛墜典誰當尋我興薦寒泉百拜公來臨公來不能
知落日下飢禽懷哉空山裏鶴飛猿與吟當年子為歌
補袞一何深承平亦得意獨能正哇淫君相此一時又
復悟良箴諛臣坐廢黜盍亦起幽沈蒲輪竟頽轂香草
空深林寂寞授書室孤甥舉遺衾生平諒已然薄俗矧
來今千山為公臺萬籟為公琴夔曠不並世月露為知
音人間蹄涔耳已矣非公心

元道州文編以元魯山為
元魯縣又臺今為玄武祠

之故及

灑水

聞郾城張伯玉訃音作

灑水復灑水東望鴈行沒殷勤一杯酒遙酹隱亭月永
懷紫髯郎冠佩見突兀巖巖石青峙鬱鬱松秀發裴回
功名會脫落豪俠窟中州有士論指與雷李屈掛弓須
扶桑洗劍必溟渤皇天靳美器一世惜英物神交付冥
漠生氣凜毛髮古來天下馬萬里入超忽良樂不並世
燕市空駿骨狂歌叫秋雲北風撼林樾

雜著五首

稟氣寡所諧衣食固無端所業在農桑甘以辭華軒田
家豈不苦歲功聊可觀帶月荷鋤歸裴回丘隴間曖曖
遠人村紛紛飛鳥還養真衡茅下庶無異患干遙謝荷
篠翁躬耕非所嘆

守拙歸田園淹留自無成長吟掩柴門遂與塵事冥素
月出東嶺夜景湛虛明揮杯勸孤影杯盡壺自傾遙遙
望白雲千載有深情

榮叟老帶索原生納決屢邈哉此前修久而道彌著人
生少至百每每多憂慮量力守故轍餘榮何足顧棲遲
固多娛幾人得其趣

桃李羅堂前霜露榮悴之咄咄俗中惡人道每如茲冬
嶺秀孤松卓然見高枝提壺撫寒柯懷此貞秀姿願留
就君住終身與世辭

世短意恒多時駛不可追感彼栢下人泣然沾我衣運
生會歸盡彼此更共之理也可柰何一觴聊可揮酒中

有深味情隨萬化遺西南望昆墟靈人侍丹池我無騰
化術帝鄉不可期且極今朝樂千載非所知

古意二首

七歲入小學十五學時文二十學業成隨計入咸秦秦
中多貴游幾與書生親年年抱關吏空笑西來頻在昔
學語初父兄已卜鄰跛鰥不量力強欲緣青雲四十有
牧豕五十有負薪寂寥抱玉獻賤薄倡優陳青衫亦區
區何時畫麒麟遇合僅一二飢寒幾何人誰留章甫冠

萬古徒悲辛

桃李弄嬌嬈梨花澹丰容盈盈兩無語
觶觶爭春風春風何許來草木誰青紅
天公亦老矣何意夸兒童昨夜花正開
今朝花已空川流不肯駐併與繁華東
梗楠十歲姿骯髒空谷中陽和不擇地
亦復難為功本無兒女心安用尤天公

潁谷封人廟

洩洩潁谷雲融融潁川水封君去我久
水雲自清美人

言君善諫微意得鄭子特於悔悟時一語發天理大孝
動天地土苴及頑鄙反身而未誠善諫且敗矣如何千
載下乃與茅焦比我行潁川道永念負甘旨願作潁尾
魴因之日千里

贈荅劉御史雲卿四首

舊聞劉君公學經發源深驂騑萬里氣聖途已駸駸大
梁語三日副我夙所欽濂溪無比流此道日西沉百年
牛山木不復秀穹林南風雖寥寥聞絃猶賞音獨憐夸

毘子一我無古今共學君所貪適道我豈任相酌無別
物徒有好賢心

阿京吾所畏早生號能文初無王家癖聲光自流聞此
行不虛來得接大小君信知珠玉淵足當羔鴈羣君家
有箕裘聖學待冊勲但使本根在枝葉復何云殷勤五
色筆未用摧千軍

學道有通蔽今人乃其尤溫柔與敦厚掃滅不復留高
蹇當父師排擊劇寇讐言真是未可必自私有足羞古人

相異同寧復操戈矛春風入萬物枯枿將和柔克己未
有加歸仁亦何由先儒骨已腐百罵不汝酹胡為文字
間刮垢搜癥疣吾道非申韓哀哉涉其流大儒不知道
此論信以不我觀唐以還斯文有伊周開雲揭日月不
獨程張儔聖途同一歸論功果誰優戶牖徒自開膠漆
本易投九原如可作吾欲起韓歐

老鶴何許來澹與孤雲同相值太虛室悠然復西東聖
學要深談惜君別匆匆何時沂水上同詠舞雩風

送欽叔內翰并寄劉達卿郎中白文舉編修五
首

忽忽歲云暮烈烈風霜威舉頭望長安游子從此歸我
有平生懷愛君如連枝半年姜肱被所樂良不貲尚恨
人事異離合無定時送君酒一杯侑以彈鋏辭上言行
路難下言長相思

六月渡盟津十月行汜水風濤脫沉舟冰雪危墮指孝
子在中野永念負甘旨家貧親已老形瘵心欲死古稱

李路孝負米曾百里顧作鯉與魴寧當怨潁尾君歸不
可緩獻壽迫歲始遙知慈母心已為烏鵲喜

一年不製衣春服犯霜風一日僅兩食腸胃不得充生
平萬里氣頓入低回中田夫怒攘臂縮首甘盲聾老兵
賜顏色歡喜無所容求索厭朋友勞苦慚僕僮無聊復
無聊又復招灾凶我有一樽酒澆君塊磊胸君年始三
十白髮成一翁顧以寸心微受此百慮攻君窮復何辭
不見閒閒公文章二百首不救四壁空

君性我所諳我心君所知凡我之所短君亦時有之謀
事恨太銳臨斷恨太遲持論恨太高徇俗恨太卑人道
自近始貧富理不齊君自不得飽欲療何人饑乞醯乞
諸鄰聖哲有明譏被髮救鄉人智者所不為且如與人
交交有非所宜白黑不復擇豁豁傾心脾泛愛豈不可
後悔終自貽又如與人言寧復無失辭刺口論成敗白
眼談歌詩世故穀黃間能不發其機聞君作損齋似覺
豪華非懲忿與窒慾百年有良規與子各努力歲晚以

為期

古人遙相望每恨不同時
同時得古人歡樂良在茲
君歸豈不佳交游滿京師
門前車馬來笑言慰所思
細話洛陽事高詠嵩山詩
宮壺發新笏宮梅耿幽姿
故應劉與白亦復念微之

飲酒五首

襄城作

西郊一畝宅閉門秋草深
牀頭有新釀意慙成孤斟
舉杯謝明月蓬華肯相臨
願將萬古色照我萬古心

去古日已遠百偽無一真獨餘醉鄉地中有羲皇淳聖
教難為功乃見酒力神誰能釀滄海盡醉區中民

利端始萌芽忽復成禍根名虛賈實禍將相安足論驅

驢上邯鄲逐兔出東門離官寸亦樂里社有拙言

離官寸亦

樂晉俚
諺云然

萬事有定分聖智不能移而於定分中亦有不測機人
生桐葉露見日忽已晞唯當飲美酒儻來非所期

此飲又復醉此醉更酣適徘徊雲間月相對澹以默三

更風露下巾袖警微濕浩歌天壤間今夕知何夕

後飲酒五首

陽翟

少日不能觴少許便有餘比得酒中趣日與杯杓俱一日不自澆肝肺如欲枯當其得意時萬物寄一壺作病知柰何妾婦良區區但媿生理廢飢寒到妻孥吾貧蓋有命此酒不可無

金丹換凡骨誕幻苦無實如何杯杓間乃有此樂國天生至神物與世作酣適豈曰無妙理滉漾莫容詰康衢

吾自樂何者為帝力大笑白與劉區區頌功德

客從崧少來貽我招隱詩為言學仙好人間竟何為一笑顧客言神仙非所期山中如有酒吾與爾同歸

酒中有勝地名流所同歸人若不解飲俗病從何醫此語誰所云吾友田紫芝紫芝雖吾友痛飲真吾師一飲三百杯談笑成歌詩九原不可作想見當年時

飲人不飲酒正自可飲泉飲酒不飲人屠沽從擊鮮酒如以人廢美祿何負焉我愛靖節翁於酒得其天龐通

何物人亦復為陶然兼忘物與我更覺此翁賢

德禪師清涼草堂

舊隱伊陸巷把茅入宴息新居蘭若峯老屋補漏圻鐘
魚有勝氣鉗錫無滯迹回頭仙人隊談笑初未隔結草
幾成壞逆旅誰主客道人那許許一笑山月白多生負
詩債秋物苦催索遙知得新句崧少為動色

上人舊隱
伊陽伊陽

有伊陸巷仙人隊
者女儿山諸峯名

少林

雲林入清深禪房坐蕭爽澄泉潔餘習高鳥喚長往我
無玄豹姿漫有紫霞想回首山中雲靈芝日應長

龍潭

層冰積浩蕩陵谷互吞吐窈窕轉幽壑突兀開淨宇回
頭山水縣亦復墮塵土孤雲鉄梁北宇宙一仰俯風景
初不殊川塗忽修阻寒潭海眼淨黝黑自太古蟄龍何
年卧萬國待霖雨誰能裂蒼崖雷風看掀舉

山中人歲
早則轉大

石入潭以駭龍
瞬息致雨故云

麥歎

借地乞麥種徼倖今年秋乞種尚云可無丁亦無牛田
主好事人百色副所求盼盼三百斛寬我飢寒憂我夢
漆南川平雲綠油油起來望河漢旱火連東州四月草
不青吾種良謾投田間一太息此歲何時周向見田父
言此田本良疇三歲廢不治種則當倍收何如落吾手
羊牛變雞猴身自是旱母咄咄將誰尤人滿天地間天
豈獨我讐正以賦分薄所向困拙謀不稼且不穡取禾

亦何由辨作高敬通惡雨將漂流吾貧有濫觴賢達未
始羞單衣適至骭一劍又蒯緱焉知寄食餓不取丞相
侯作詩以自廣時用商聲謳

北邙

驅馬北邙原踟躕重踟躕千年富貴人零落此山隅萬
塚不復識榛莽餘龜趺賢愚同一盡感極增悲歎粵人
惟物靈生也與道俱一為物所眩遂爾迷厥初蛻骨幾
山丘百年不須臾歸盡固其理交喪亦已愚陳迹有足

悲奈此萬化途馬知原上塚不有當年吾

龍門雜詩二首

石樓繞清伊塵土天所限人言無僧久草滿不復刻灘
聲激悲壯山意出高蹇當年香山老掛冠遂忘返高情
留詩軸清話入禪版誰言海山去蕭散仍在眼溪寒不
可涉倚杖西林晚

不見木庵師胸中滿泥塵西窓一握手大笑傾冠巾青
山有佳招一游負因循老筇動高興萬景森前陳乾元

先有期清伊亦知津細看潛溪樹高卧香山雲學詩二
十年鈍筆死不神乞靈白少傅佳句儻能新遙遙洛陽
城梅花千樹春山中有忙事寄謝城中人

豐山懷古

豐山一何高古屋蒼烟重開門望吳楚鳥去天無窮連
山橫巨鰲白水亘長虹川原鬱佳氣自古南都雄炎精
昔季興卧龍起隆中落落出奇策言言揭孤忠時事有
可論生晚恨不逢漢賊不兩立大義皎日同吳人操等

耳忍與分河潼奪操而與權何以示至公一民漢遺黎
尺地漢故封守民及守土天地與相終不能禦寇讐顧
以寇自攻既異鴻溝初又非列國從一券損半產二祖
寧汝容端本一已失孤唱誰當從至今有遺恨廟栢號
陰風舊聞清冷淵天籟如撞鐘山經野人語誕幻欺孩
童開元有亂階鹿飲溫泉宮黃猿何為者乃爾能嘯兇
乾坤之大音久鬱理當通清霜旦夕落佇爾驚羣聾

乙酉六月十一日雨

一旱近兩月河洛東連淮驕陽佐大火南風捲黃埃草
樹青欲乾四望令人哀時時怪事發雨雹如李梅我夢
天河翻崩騰走雲雷今日復何日駛雨東南來元氣淋
漓中焦卷意已回良苗與新穎鬱鬱無邊涯音崖書生如
老農苦樂與之偕閭閻聞古語一笑心顏開酉年酒如
漿乾溢安能裁唯當作高廩多具尊與壘家人笑問我
君田安在哉駛雨與快同音見魏志

示姪孫伯安

伯安入小學穎悟非凡兒屬句有夙性說字驚老師見
汝挾書歸憶我青衿時青衿昨日耳齒髮忽如茲讀書
誤人多濶疎亦天資元無倚天劍可斷扶桑枝倚梯望
青冥愚者知笑之壯事已無取老謀欲何施幸此掌中
孫未染如素絲就令好紙筆門戶誰當支我有商餘田
汝壯可耘耔便當學種樹未用城南詩

伯安方讀韓集
符讀書城南

種松

百錢買松羔植之我東墻汲井澆塵土插籬護牛羊一

日三摩挲愛比添丁郎昨宵入我夢忽然變昂藏昂藏上
雲雨慘澹含風霜起來月中看細鬣錯針芒惘然一太息
何年起明堂鄰叟向我言種木本易長不見河畔柳顧
盼百尺強君自作遠計今日何所望

虞卿麻長官成趣園二首

鑿池水交流築屋山四繞衡門在人境三徑深以悄中
庭八九樹晨坐聽百鳥人生信多慮長寢容未了虛舟
有天游我定物自擾豈不與世並自是萬物表達觀無

不可言外當意曉

蹉跎匡山游爛漫彭澤酒慨然千載上懷我平生友夫
君負奇節劍氣鬱星斗為吏非所堪徑去如避走王官
唐以還寂寞蓋已久柴車君來隱清風動林藪至今溪
上詩往往在人口淵明不可作此士寧復有

雜詩四首

相士如相馬滅沒深天機區區銅馬法徒識牝與驪人
言當塗公惡人知其微如何許邵語受之不復疑知人

固不易人亦未易知姪妍在水鏡鉛粉徒自欺孰為仁
義人未假已不歸伯樂不可作思與曹瞞期

世事如大弩人若材官然乘勢易發機非時勞控弦又
如大水中置彼萬斛舡雖有帆與檣亦須風動天不見
周公瑾弱齡已飛騫不見師尚父鷹揚在華顛彼非生
而材此豈晚乃賢鑑基喻智慧要必有待焉嘆息狂馳
子嘗為愚者憐

崑山有璞玉外質而內美唯其不自銜故與頑石齒和

也速於售再獻甘減趾在玉庸何傷惜君兩足耳
堂堂明堂柱根節幾歲寒使與蒲柳同扶厦良券難我
衣敝緼袍我飯苜蓿盤天公方試我劍鋏勿妄彈

采杞

仙苗不擇地榛莽散秋實微霜綠未隕濃露紅欲滴方
書尚服餌僮僕課采拾花葉久已厭功實從此得苦荼
薦奇味凡醞化靈液人傳東坡事世驗西河術誑口亦
自佳輕骨況可必維物多似是致用相萬一向非觀玉

篇誰為分杞棘

宿菊潭

田父立馬前來赴長官期父老且勿往問汝我所疑民
事古所難令才又非宜到官已三月惠利無毫釐汝鄉
之單貧寧為豪右欺聚訟幾何人健鬪復是誰官人一
耳目百里安能知東州長官清白直下村稀我雖禁吏
出將無夜叩扉教汝子若孫努力逃寒飢軍租星火急
期會切莫違期會不可違鞭扑傷汝肌傷肌尚云可天

關令人悲

觀浙江漲

一旱千里赤一雨垣屋敗
浙故以江名暴與衆壑會
初驚沙石捲稍覺川谷隘
雷風入先驅大塊供一噫
千帆鼓前浪萬馬接後派
崩崖不暇顧拔木無留碍
憑陵如藉勢洄洑各有態
平分乍舒徐怒觸忽碎壞
雲蒸楚樹杪雪映商嶺
背髣髴千丈潮恍與海門
對欲飛鬬蛟鱷燃犀出鱗
介陽侯富陰族萬首露光
恠翠蕤澹偃蹇鉦

鼓亂碇磕永懷䟽鑿力重歎神禹大乾坤海為壑未礙
變橫潰納汙非無處流惡聊自快投詩與龍盟滌蕩煩
一再時拜大赦五日矣

鸛雀崖北龍潭

層崖閼頑陰水木深以阻湍聲半空落洶洶如怒虎風
生木葉脫魄動不敢語何年渾沌竅靈物此棲處初從
一綫溜開鑿到神禹雲雨鼓飛浪噴薄齊萬弩藏珠驪
龍頷百斛快一吐油油入無底細散不濡縷歸藏海有

穴沅溢愁下土南峯天一柱萬古鎮幽府江山有奇探
落景迫行旅多慙茹芝人終年看飛雨

五松平

竹港晨露白石門秋氣寒湍流落澗壑細路深茅菅江
平白石出竟日沿清灣四顧不見人山鳥時聞闕蒼崖
入地底烟靄青漫漫力盡不能過却坐空長歎青天白
雲間可望不可攀虛名竟何得行路乃爾難

阻雨張主簿草堂

濕暑雲氣鬱浸淫

去聲

成績雨南風竊陰機萬籟困掀舉

飛濤限江岸懸流迫茅宇塊坐百慮滋歸與生鳥羽兒
童十日約竹馬候門廡曾是百里程川途忽遐阻少游
去我久念子平生語款段劣可乘羸餘果何取河汾敝
廬在坐滯西南楚世事不可期客心徒自苦

贈荅楊煥然

詩亡又已久雅道不復陳人人握和璧燕石誰當分關
中楊夫子高誨世所聞十年玄尚白藜藿甘長貧有來

河水篇四海付斯文斯文有定在桓生知子雲古來知
已難萬里猶比鄰千人國中和要非心所親東楚西南
秦望君勞我神相逢不得語別去徒殷勤白雲不可贈
相思秋復春

送詩人李正甫

陽和入枯株靄靄含芳津山頭太古石不與萬物春朝
從木客游暮將山鬼隣紫芝僅盈舄幽蘭不充紉青雲
入長吁肝膽空輪囷我嘗讀君詩天趣觸眼新秦游得

豪宕晉產餘真淳怒虎不受唾駭鹿未易馴安坐誰不
如半生走逡巡蒼蒼不可問藐藐誰當親青山碾為塵
白日無間人空歌東野曲不救西州貧

遺山集卷一

欽定四庫全書薈要卷一萬六千六十四

集部

遺山集卷二

金元好問撰

五言古詩

萬化如大路

萬化如大路物我適相遭往來限隣屋夢寐阻同袍斷
金幾何人年運劇銷膏相歡顧不足爾戈奚暇操古來
太山名達觀等秋毫蠻觸徒能國螺贏竟誰豪曠蕩覽

八紘美惡自為曹造物無巧擇大塊有并包暴公今在
亡轉燐起蓬蒿孤心既悄悄衆口益嗷嗷同塵寧當悔
枉已乃為勞鹿門有高躅世網僅能逃

曉發石門渡湍水道中

水經湍音專

疎星澹秋明陰霞絢朝映積雨成坐愁晨光動幽興石
門歸馭引湍浦漁刀並曠蕩萬景新歸藏四山靜平湖
風漪綠遠岸秋沙淨洋洋遊鯨逝汎汎輕鷗泳隱顯乖
夙心感寓見真性倦遊徒自悼違已將安竟憂端從中

來茫茫發孤詠

放言

韓非死孤憤虞卿著窮愁長沙一湘纍郊島兩詩囚
生定能幾肺肝日相讐井蛙奚足論禪虱良足羞正有
一朝樂不償百年憂古來帝王師或從赤松遊大笑人
間世起滅真浮漚曾是萬戶封不博一掉頭有來且當
避未至吾何求悠悠復悠悠大川日東流紅顏不暇惜
素髮忽已稠我欲升高高揮杯勸浮丘因之兩黃鵠浩

蕩觀齊州

李道人崧陽歸隱圖

北山范寬筆老硬無妍姿南山小平遠澹若常郎詩崧
陽古仙村佳處我所知長林連玉華細路入清微連延
百餘家柴門水之湄桑麻蔽朝日鷄犬通垣籬媿我出
山來京塵滿山衣春風四十日夢與孤雲飛可笑李山
人嗜好世所稀逢人覓詩句不惜怒與譏道人本無事
何苦塵中為京師不易居我癡君更癡山中酒應熟幾

日是歸期

黃公廟

羈客無恒居六月走長路清風黃公祠地古欣所遇劒
飛素靈哭龍躍雲雨赴堂堂文成君談笑取帝傳功名
要有命陰相果何預誰謂圯上人異事驚竹素河清不
可俟筋力疲世故袖間一編書塵埃嘆遲暮

學東坡移居八首

廢地三畝餘十年長蒿菜瓦礫雜糞壤白骨混蒼苔孤

客無所投即此營茅齋壘斷豈不苦寢處亦可懷辱身
賤者事寧當惜筋骸伐木荒林中運甕古城隈辛勤八
十日吾事乃得諧買宅必萬錢一錢不天來今晨見此
屋一笑心顏開

誰謂我屋寬寢處無復餘誰謂我屋小十口得安居南
榮坐諸郎課誦所依於西除著僮僕休休得自如老我
於其間兀兀窮朝晡起立足欠伸偃卧可展舒窓明火
焙煖似欲忘囚拘屋前有隙地客舍不可無花欄及菜

圃次第當耘鋤東野載家具家具少於車我貧不全貧
尚有百本書

故書堆滿床故物貯滿箱渾渾商寶鼎累累漢銅章杖
飾昭敬恭嚴卯訶瘴剛雷文繞杖節獸面出佩璜私印
刻王尊玉斗蛟龍翔逸少留半紙魚網非硬黃亦有墨
首帖不辦作鴈行雪景睿思物宣政舊所藏晉公古漁
父浩歌濯滄浪因觀宮騎圖卧馳識提囊谿石含餘潤
奚墨凝幽香南榮挂風響雲裾珮鏘鏘鏡背先秦書八

字環中央讀之三嘆息此日何時光

壬辰困重圍金粟論升勺明年出青城瞋目就束縛毫
釐脫鬼手攘臂留空橐聊城千里外狼狽何所託諸公
頗相念餘粒分鳬鶴得損不相償抔土填巨壑一冬不
製衣繒纊如紙薄一日僅兩食強半雜藜藿不羞蓬累
行粗識瓢飲樂敵貧如敵寇自信頗亦慙兒啼飯籬空
堅陣為屢却滄溟浮一葉渺不見止泊五窮果何神為
戲乃爾虐

舊隱嵩山陽笋蕨豐餽餉新齋浙江曲山水窮放浪乾
坤兩茅舍氣壓華屋上一從陵谷變歸顧無復望樵漁
憶還往風土夢間曠恍如悟前身姓改心不忘去年住
佛屋盡室寄尋丈今年僦民居卧塌礙盆盎靜言尋禍
本正坐一出妄青山不能隱俛首入羈鞅巢傾卵隨覆
身在顏亦強空悲龍髯絕永負魚腹葬置錐良有餘終
身志懲創

國史經喪亂天幸有所歸但恨後十年時事無人知廢

興屬之天事豈盡乖違傳聞入讎敵祇以興罵譏老臣
與存亡高賢死兵饑身死名亦滅義士為傷悲哀哀淮
西城萬夫甘伏尸田橫巨擘耳猶為談者資我作南冠
錄一語不敢私裨官雜家流國風賤婦詩成書有作者
起本良在茲朝我何所營暮我何所思胸中有茹噎欲
得快吐之濕薪烟滿眼破硯冰生髭造物留此筆吾貧
復何辭

東坡謫黃州符藥行江湖荒田拾瓦礫賤役分僮奴我

讀移居篇感極為悲歎九原如可作從公把犁鋤我貧
公亦貧賦分無賢愚論人雖甚媿詩亦豈不如

此州多寓士論年悉肩隨風波同一舟奚必骨肉為倪
家蓮華白每釀必見貽季昌妙琴事足以相娛嬉郭侯
家多書篇帙得徧窺趙子篤於學間以問所疑王生舊
隣舍窮達心不移千里訪存歿十口分寒饑獨有仲通
甫天馬不可羈直以論詩文稍稍窺藩籬永懷王與李
朔漠行當歸書來聞吉語報我脫縶維慚非一狐腋不

直五穀皮我作野史亭日與諸君期相從一笑樂來事
無庸知

歷下亭懷古分韻得南字

東秦富佳境北渚擅名談茲游亦已久纔得了二三南
山壓城頭十里奎與函洑流出地底城隅滿泓潭金絲
弄晴光玉玦響空嵌清漣通畫舫秀水深雲龕華峯水
中央鬱鬱堆烟嵐荷華望不極綠淨紛紅酣毒熱非山
陽卑濕無江南承平十萬戶他州隔仙凡劫火土一丘

樹老草不芟巧盡露天質到眼皆竒探千年歷下亭規
摹見覃覃懷賢成獨詠勝賞何由叅

舜泉效遠祖道州府君體

重華初側陋嘗耕歷山田至今歷下城有此東西泉喪
亂二十載祠宇為灰烟兩泉廢不治平漸著瓦礫填蛙
跳平聚浮沫羊飲留餘蘊我行歷荒基涕下何漣漣舜
不一井庇下者何有焉帝功福萬世帝澤潤八埏要與
天地並寧待一水傳甘棠思邵伯自是古所然我欲操

畚鍤浚水及其原再令泥濁地一變清冷淵青石壘四
周千祀牢且堅石渠漱清溜日聽薰風絃便為泉上叟
杯飲終殘年

與張仲傑郎中論文

文章出苦心誰以苦心為正有苦心人舉世幾人知工
文與工詩大似國手碁國手雖漫應一着存一機不曾著
著看平何異管中窺文須字字作亦要字字讀咀嚼有餘
味百過良未足功夫到方圓言語通眷屬只許曠與夔聞

經知雅曲今人誦文字十行誇一目闕顛失香臭瞽視紛
紅綠毫釐不相照覲面楚與蜀莫訝荆山前時聞別人哭
濟南廟中古檜同叔能賦

亭亭祠宮檜鬱鬱上雲雨扶持幾年來造物心獨苦青
餘玉川潤根入鐵岸古雖含棟梁姿斤斧安得取流湫
地中久駭浪思一鼓天柱屹不移水國奠平土乾坤此
神物甲乙存世譜瀨鄉留耳孫闕里傳鼻祖秦松徒自
汙蜀柏聊共數會待十抱成茲焉重摩拊

銅鞮次村道中

山逕一何惡一澗復一嶺昂頭一握天放脚百丈井武
鄉有便道故繞銅鞮境涉險良獨難又復觸隆景羸駢
蹄已穴怨僕氣將瘳與世恒背馳用力何自省河汾紹
絕業疑信紛莫整銘石出壙中昧者宜少警少時曾一
讀過眼不再省南北二十年夢寐猶耿耿喻如萬里別
燈火得對影行役豈不勞聊當忍俄頃

蕭齋

并引

故民部長陵蕭公泰和大安之間名德雅望朝臣

無出其右其為太原道漕使時不肖方廁諸生間

顧嘗一望眉宇以為甚幸然亦以齒少且賤不得

與橫經之末而為恨也北渡後居陽平見關中人

邢公達談公平生往往色揚而神躍問之知其為

公夫人之猶子也蓋公達之先人於公恩義良厚

而公所以報之者為甚力公達初仕部掾年甫三

十遂為州上佐出入臺閣者二十年雖其材致然

亦藉公為之司命耳予雅知公達之敬公也凡欲
聞公之故則就訪之公達所居之屋乞名於予因
以蕭齋目之且為之說云士之生世有一鄉之士
有天下之士有一人之所私慕有天下之所共稱
分限所在不能以強人而人亦不得而強之也惟
公承王公餘烈奕葉台鼎世譜完具與當陽杜氏
相上下故言氏族者推其貴出入經史優柔饜飫
發摘秘奧不減前輩蔡無可故言討論者服其博

奏讞疑獄致力忠愛一言之仁利及永久故言斷
獄者歸其平彊禦不奪其操公相不易其介幅巾
鄉社坐鎮頽俗故言進退者推其高蓋天下所共
稱非一人之私慕高山仰止其誰曰不然古人有
愛蕭子雲筆札者得蕭之一字遂以名所居況於
其所天乎因為詩以貽公達有好賢如緇衣者請
為同賦焉

十年金門客一日蓬蒿人烟煤兩椽屋因公名字新昔

公無恙時四海望經綸敦龐一古儒風采自名臣人亡
典型在百世留清塵師尊世共然况予夙所親愛公入
夢想逶迤見垂紳教兒多讀書公言諒諄諄他時門戶
改亦唯公之姻我嘗望公顏道左避朱輪至今誦其詩
喜色為津津歸秦如未老會買東家隣

別李周卿三首

行路溢於棘單車望千山歌君歸雲曲清涕留餘潛六
年河朔州動輒得謗訕唯君篤高義日來欸柴關古交

松柏心今交桃李顏
古人去不返古道挽不還
相思一樽酒幽恨寄山間

風雅久不作日覺元氣死
詩中挂天手功自斷鰲始古
詩十九首建安六七子中間
陶與謝下逮韋柳止詩人
玉為骨往往墮塵滓衣冠語
俳優正可作婢使望君清
廟瑟一洗箏笛耳

城居日蛙黽局促復局促
去作山中客放浪誰檢束
溪光淡於水山骨淨如玉
懷我同心人團茅住深竹
垂綸

鮮可食種秫酒亦足石壇三萬丈醉眼天一粟安得萬
里風相從兩黃鵠

周卿學有淵源東州詩人未見其比與子約西游如詩中所說

訓韓德華送歸之作

良朋滿東州歲月見忠悃韓侯晚相值意氣尤懇懇我
嘗相斯人趣向識端本立節柏有心樹德蘭在畹官榮
晚不顧寄興浮雲巘今世走名場旗旆幾仆偃賤子本
無取玉趾渠往返昨聞遂歸養見謂竹林阮暑涂三百
里追送不憚遠觀君木訥姿百念為日損顧方慙衣網

又被以華袞桑榆儻可收歲事在櫛衮里門眼中見歸
袖勞童挽雞黍先有期升堂未言晚

渠猶
類然

戊戌十月山陽雨夜二首

朔吹作還止雲意鬱以周十月雷收聲陽和自油油此
雨非舊雨春旱歷夏秋道路土三尺今朝見浮漚三城
信樂土凶年未消憂一蝗食禾盡半菽不易求流民四
方來斷港魚蝦稠忍死待一麥秋種且未投乾溢誰所
司雩壇徧九州醉飽到狐鬼巫覡自懷羞帝命制江湖

野語良悠悠龍公為汝賀桑榆定可收

霏霏散浮烟靄靄集微至出門望白塔但覺襟袖潤繁

聲忽赴廊細點復成陣久渴宜未厭平已作寧小靳山

陽冬候煖麥脚易滋分去土膏入滲漉破粒容可赴此

邦信可樂風土同一晉單車我東來塵土滿歸鬢裹糧

失先具閑糴因餘吝今朝人事改一雨開百順僧窓晚

色淨喜極夢為盡枕上一詩成燈花落紅燼

看山

慘慘悲去國鬱鬱賦卜居不采西山薇即當葬江魚今

日忽有得蕩如脫囚拘青山坐終日忘讀案上書臯壤
與山林使我欣然歟我身天地間託宿真蘧廬無窮閱
有限萬期亦須臾坎止及流行何計疾與徐百年險與
夷又似萬里途良馭馳康莊九折亦摧車必惟易之就
遇險當何如化化復生生體異理不殊鷺非浴而白烏
豈黔而烏誰續長蹊鶴誰截短足鳬孔墨不煖席盜跖
華堂居公車困方朔太倉飽侏儒杜子露雙肘朝叅出

無驢軟裘與怯馬照耀輿臺軀天隨隱笠澤杞菊供盤
盂擊鮮日為具大嚼皆屠沽乖逢自乖逢賦分無賢愚
作計窮一我造物良區區向也憂不足乃今樂有餘

九日讀書山用陶詩露淒暄風息氣清天曠明
為韻賦十詩

行帳適南下居人跼庭戶城中望青山一水不易渡今
朝川涂靜偶得展衰步蕩如脫囚拘廣莫開四顧半生
無根著筋力疲世故大似丁令威歸來嘆墟墓鄉閭喪

亂久觸目異平素
粉榆雖尚存歲晏多霜露

今日復何日霜氣
倏已淒登高有佳
招山中古招提
翩劉公子玉田重
相携乾坤動詩興
澗壑忘攀躋霍侯
家甚貧劣有酒與
雞城居厭輦鼓移
家此幽棲世網不
易逃所向皆塵泥
何以濯我纓林間
有清溪

山腰抱佛剎十里
望家園亦有野人
居層崖映柴門昔
我東岩君曾此避
塵喧林泉留杖履
歲月歸琴樽翁今
為飛仙過眼幾寒
暄蒼蒼池上柳青
衫見諸孫疎燈照

茅屋新月入顏垣

二句先
人詩

依依覽陳迹惻愴不能言

霜氣一區薄杳杳秋山空臨高望烟樹黃落雜青紅造
物故豪縱窮秋變春容錦障三百里不盡臺山東粲粲
黃金華羅生蒿艾叢野人不知貴幽香散秋風秋物自
橫陳顧揖苦不供誰能搖醉筆吐句凌清雄

宇宙有此山閱世過鳥疾何人不此遊名姓寧復識茲
辰世所重前代多盛集柴桑有故事二謝留俊筆併數
孟與桓此外誰記憶人生百年內踏地皆種迹獨惟我

輩人興懷念今昔山林與臯壤自古長太息

賞心古難并暮景日易費故人成此遊尊酒重相慰新
詩互酌唱清談見滋味鱸鮓方便蹇龜黽共騰沸懸險
劇褒斜清渾雜涇渭爭教十圍腹滿貯憂與畏情親到
真率寧復轉喉諱鄭重伯雅生藉汝聊吐氣

往年在南都閑閑主文衡九日登吹臺追隨盡名卿酒
酣公賦詩揮灑筆不停蛟龍起庭戶破壁春雷轟堂堂
髯御史痛飲益精明亦有李與王玉樹含秋清我時最

後來四座頗為傾今朝念存歿壯心徒自驚

我在正大初作吏浙江邊山城官事少日放浙江船菊
潭秋華滿紫稻釀寒泉甘腴入小苦幽光出清妍歸路
踏明月醉袖風翩翩父老遮我留謂我欲登仙一別半
山亭回頭餘十年江山不可越目斷西南天

吾山一何高清凉屹相望龍頭出白塔佛屋壓青嶂雲
光見秋半旭日發毫相峩峩寶樓閣金界儼龍像鄉曲
二十年香火闕瞻向金花香綿草夢想雲雨上福田行

欲近重為詩酒障終當陟層巔放眼天宇曠

紫微老仙伯少日見承平甲子五百餘雙瞳益清明披
莊不盈尺翛然澹無營庭柯挂秋蔬老樹風泠泠我有
年德尊公深鄉曲情思得菊潭酒為公制頽齡作詩語
同游明年復尋盟看翁九節杖翩翩上崢嶸

留月軒

丈室何所有琴一書數冊花竹結四隣繁陰散芳澤閒
門無車馬明月即佳客三人成邂逅又復得驪伯驪伯

屬我歌蟾兔為動色商聲隱金石桂樹風索索乾坤月與我
光滅即生魄元精貫當中寧有天壤隔卯君尚奚待言論累
數百多談令人厭坐睡驚隨幘一笑雞未鳴虛窗自生白

梨花海棠二首

梨花如靜女寂寞出春暮春工惜天真玉頰洗風露素
月澹相映蕭然見風度恨無塵外人為續雪香句孤芳
忌太潔莫遣凡卉妒

妍花紅粉粧意態工媚嫵窈窕春風前霞衣欲輕舉金

槃渺華屋國艷徒自許依依如有意脉脉不得語詩人
太冷落愁絕殘春雨

趙吉甫西園

園名
種德

王城比民居近市無間田間田八九畝乃在城西偏久
矣瓦礫場莽為狐兔阡高人一留顧老木生雲烟築屋
臨清流開窓見西山人境偶相值遂無城市喧趙侯嗜
讀書兀坐守遺編性情入吟詠古淡無妖妍酸醎與世
殊至味久乃全我作別墅詩請為子孫傳耕耘有定業

歎豐屬之天寧作鹵莽兒袖手待逢年汲古先有齋種
德今有園期君在晚歲無庸計目前

臨汾李氏任運堂二首

并序

彥仁從軍久厭於事物之累念欲脫去之而不
可得也故嘗鬱鬱不自聊求予發藥之予名其
居曰任運堂且為賦詩

官職有何好凜凜蹈危機車塵及馬足捧手仍低眉棄
去何足道無從脫繫維不如聽其然歲晚儻可期此心

未馴初養虎時飽飢一為金石止坐閱萬物馳汨泥揚
其波哺糟醖其醕漁父我所學靈均竟奚為上堂壽慈
親兄弟如墳麓菽水足致樂況有甘與肥人生天地間
長路有險夷遇險即欲避安得皆通達君家北山翁百
世留清規樂天而知命行矣君何疑

北山翁彥仁之伯
祖泰和間以高道

提點天長胥華公贈詩有
百世清規之語故及之

履危恨無機避禍欣有策後慮徒自密前路寧汝測七
戰歿牖下坐談得刺客周身容孔智伐樹不宋厄九折

怯乘險瘴海悲遠謫就令家長安獨不死牀簀人生多
憂畏年壽幾至百惴惴首尾間天宇坐成窄重泉青雲
梯平地黃土陌乖逢有定在拙計徒巧擇行樂當及時
莫待頭雪白

黃土陌見初學記奴僕門

題張左丞家范寬秋山橫幅

層崖閔長陰細逕緣絕巘梯雲欄干峻廓廓清眺展斜
陽半天赤飛鳥大江遠清霜張秋氣草樹生意意剪風雷
斫堅敵旆旆紛仆偃崢嶸峯巒出莽蒼林薄晚盤盤范

家筆老懷寄高蹇經營入慘澹得處乃蕭散
高丘動歸興突兀青在眼何時卧雲身團茅
遂踈嬾

宿張靖田家

地屬壽陽

川途盡坡陀嶺路入荒梗微茫望烟火向背得廬井
殘民安朴陋倦客喜幽屏兒童聞叩扉租吏有餘警
兩崖分藪薄砂石立頑獷湍流落空嵌百折不容騁
山深饒風露夜氣淒以耿園花澹相望邊月空照影
深居苦不早素髮忽垂領誰謂林野人茲焉惜清景

曲阜紀行十首

荒城卧魯甸寒日澹平蕪千年素王宮突兀此城隅我
昔入小學首讀仲尼居百讀百不曉但有唾成珠少長
授魯論稍與義理俱攝齊念升堂壞壁想藏書翩翩七
十子佩服見舒徐慨然望闕里日思膏吾車五原東北
晉因循迫桑榆今日復何日南冠預庭趨隱隱金石聲
恍如夢清都偉哉神明觀欣幸當何如

殿屋劫火餘瓦礫埋荒基入門拜壇下儼然想光儀憶

當講授初佩服何逶迤登降幾何人鸞鳳相追隨千年
仰階級天險不可躋文杏誰此栽世世傳清規植根得
所託在木將何知

堂堂魯三檜培植出天巧規摹欲十抱竒秀供百繞誰
言甲戌亂煨燼入炎燎青烟干雲上羣鶴空自矯哀哀
嶧陽人腸肺痛如攪魯郊木何限名取唯一少神明信
扶持厄運豈易曉雩臺滿荒榛達宮餘曲沼紛紛閱成
壞何異晏與早道存有汙隆物齊無壽夭霜皮眼中見

鬱鬱自塵表君看太山石萬古青未了

陋巷陋復陋老屋在人境門前軒蓋多閉戶自幽屏近
郊無百畝負郭纔半頃饘粥聊自供取足唯一井此井
閱千歲清節傳箕穎尚想瓢飲初至味久益永德鄰與
周旋聖域容造請貧中有此樂日暮獨何炳泓然窺古
甕一勺試甘冷上池果能神轉盼得深省塵埃竟何有
素髮忽垂領共學誰我容從之抱脩綆

泮宮何所有舞雩但荒臺泮水涸已久北風捲黃埃顧

瞻魯公宮感極令人哀獻馘亦盛事規摹到平淮作計
萬萬古而今安在哉獨愛鼓瑟翁不與三子偕宗周方
訖錄聖師猶卷懷但欲春服成風乎詠歸來我亦淡蕩
人涉世寡所諧浴沂行有日一笑心顏開

大姦何所如猘猢猻且猛雖然弭耳伏擇肉會一騁卯
也不敢露名與聖師並天刑竟莫逃不待七日頃曹瞞
盜漢璽僅得保腰領與卯均小人脫網乃差幸小偷學
不至適足污鍤鼎不從市朝肆必就遠方屏兩觀餘坡

陀萬世示頑獷神兵懍可怖過者宜少儆

不見講堂處指似存世譜遺基洙泗間荒惡餘十畝聖
師既已老自衛歸在魯正樂修六經卒業此其所當時
季路室完整逮建武太僕忠且壯持用方禦侮如何唐
盛日一廢不重舉中和天地位寧復俟庭廡所嗟世道
衰師授日莽鹵空餘千歲井黝黑照終古

白塔表佛屋萬瓦青粼粼何年勝果寺西與姬公鄰塔
廟恣汝為豈合魯城闐魯人惑異教吾道宜湮淪許行

學神農耒耜手自親當時子孟子直以為匪民况彼桑
門家糞壤待其身一朝斷生化萬國隨荆榛孟氏非所
期安得楊與荀丹青贊神化舊染為一新坐令鐘魚地
再睹籩豆陳吾謀未及用勿謂秦無人

天地有至文六籍留聖謨聖師極善誘小智祇自愚文
章何物技不直咳唾餘操戈競虛名望塵拜高車所得
不毫髮咎責滿八區公論懸日星豈直小人儒喻彼失
相者張不知所如指南一授轡聖門有修途陽光照薄

暮尚堪補東隅悠哉發深省灑掃今其初

林墓連魯城方廣十里間林間百草具棘刺死不蕃楷
槐作橫理青青閱千年懷人成一慨何止召公賢博陵
石翁媪名字無留鐫兩獸墓前物歲久乃訛傳昨我游
魯門規作孔林篇聖人與天大聖道難為言所見不一
記來者何述焉詩成私自媿小子良斐然

寶嚴紀行

陰崖轉清深秋老木堅瘦城居望已遠步覺脫氛垢寶

巖夙所愛丈室方再叩曛黑纔入門徑就石泉漱遙遙
金門寺寶焰出巖竇我豈無盡公昔見今乃又同來二
三子寢飯故相就况有杜紫微琴筑終雅奏曛曛上初
日深樾炯穿漏逶迤陟兩巘萬里若迎候絕壁三面開
仰看勞引脰兩山老突兀屹立柱圓覆諸峯出頭角隨
起隨偃仆不可無烟霞朝暮為先後橫亘連巨鰲飛墮
集靈鷲九華與奇巧五老失渾厚想當位置初遂欲雄
宇宙太行有缺谷勝絕無出右大似塵外人眉宇見高

秀哀湍下絕壑電擊龍怒鬪崩奔翻雪窖瑩滑瀉瓊甃
窮源得懸流偉觀駭初邁僊人寶樓閣白雨散簷溜天
孫拂機絲素錦絢清晝永懷登高賦意匠因馳驟窘於
游暴秦百說不一售林間太古石稍復抔飲舊已約銘
窪尊細鑿留篆籀茲山緣未了僧夏容宿留終當丐餘
年奇探盡雲岫

鴈門道中書所見

金城留旬浹兀兀醉歌舞出門覽民風慘慘愁肺腑去

年夏秋旱七月黍稷吐一昔營幕來天明但平土調度
急星火逋負迫捶楚網羅方高懸樂國果何所食禾有
百膳擇肉非一虎呼天天不聞感諷復何補單衣者誰
子販糴就南府傾身營一飽豈樂遠服賈盤盤鴈門道
雪澗深以阻半嶺逢驅車人牛一何苦

岳祠齋宮夜宿

煌煌德寧宮望秩年祀永唐末幾焚蕩規制仍峻整龍
旗嚴黼座金罍散光炯嶽拜行且周偉觀竊欣幸青紅

留壞壁兵衛自馳騁木杪見龜趺雄筆映鍾鼎中和昔

喪亂已溺寧再拯有來鴈門公赤手探虎鯁經營入慘

澹灑落出鋒穎凶豎竟自摧神鑒益彪炳青山閱人代

今古一炊頃摩挲盤根槐甲子誰記省竭來石門道烟

岫接雲嶺霄漢瞻上階濃碧插秋影青林雨聲集懸瀑

激奔猛森然心魄動冰雪淒以耿飄飄想仙袂飛下玉

蓮井昨夢知是非復此造真境妙香淨餘習灝氣發新

警鶴書來何遲素髮迫垂領玄壇展哀步似欲逐幽屏

高柯月紛紛裴回惜清景

示程孫四首

并州望南宮東南千里餘六年念兒女鬱鬱心不舒程
孫問安否一月兩寄書老我倦出門況是涉畏途鞍馬
二十日面色為焦枯白兄應見笑此行亦區區

吾女在吾家先以安卑弱雖然適貴門一味甘儉薄財
廉出仁讓語省見端慤婦道化一州母女皆願學州人
聞我至相與喜且愕謂我六十翁齒髮未衰落擊鮮日

為具和氣動城郭為說婿女賢宅相知有託乃公私有
賀一月醉杯杓生女四十年今有為父樂

直孫年志學玉立無纖瑕簡孫甫勝衣芳蘭茁其芽粲
粲彩翠翔鵷雛映朝霞諸孫獻公壽喜極復長嗟吾母
河南君閨門靜無譁殷勤教女孫乃今成汝家老我何
足道外舍儘得誇

會聚樂不貲言別淒以惻風雲動老懷車馬見行色明
年吾六十家事斷闕白唯當近酒醺亦復拋書冊提携

兩童子款段或下澤玉雪念吾孫未覺千里隔乘興徑
一來髯婿當速客

九月初霖雨中感寒痺作

留飲工作崇臂股半風淫風淫喜陽景旬浹坐秋霖兒
寒益跳梁哀暮苦難任病枕怯遙夜破窻風露深兩年
魏大名千門響霜碓客行足繒纊家居但踈衾絢絲不
易得候蟲徒自吟無衣思南州傷哉非獨今

同白兄賦餅中玉簪

畏景衆芳歇仙葩此夷猶冰姿出新沐娟娟倚清秋昨
夢今見之風鬟玉搔頭誰言閨房秀高情渺林丘碧筵
古銅壺一室香四周懷人成獨詠遠思徒悠悠

野史亭雨夜感興

私錄闕赴告求野或有取秋兔一寸毫盡力不易舉衰
遲私自惜憂畏當誰語展轉天未明幽窓響踈雨

哭延孫

兒生去年冬間里日相慶今年迫周晬疹痘俱已竟爛

斑綴錦衫未與玉雪稱宅相望此孫惜愛均氣命一宵
誰奪去遽有亡辜橫情鍾未難忘力挽將安勝憶昔點
粧初季女抱臨鏡灼灼芙蓉花澹與清波映霜風入芳
渚瘦綠餘荷柄嬌紅耿在眼百喚不一應寂寞空鏡前
老眼淚如迸

贈鶯

隣牆擁高樹深樾蔭衡宇山禽十百種晨夕所棲處獨
愛黃栗留姪姀如稚女笑啼啼又笑宛轉工媚嫵低窺

疑欲下轉盼忽驚舉花暗柳陰陰尚記兒時語詩家此
尤物名字喧樂府天真累絲竹客服仍楚楚宮額畫眉
潤黛黑抹金縷恨不掌上看毛羽得細數山城無與樂
好鳥亦求侶時將貫珠來有唱當和汝

讀書山月夕二首

層崖多古木細路深莓苔柴門開曉日雲際青山來靜
中有真趣孤賞何悠哉

久旱雨亦好既雨晴亦佳胡床對明月樹影含清華墻

東有沔池歌枕聽鳴蛙



遺山集卷二



總校官庶吉士臣張能照

校對官修撰臣吳錫齡

謄錄監生臣呂永安